

VENDIM
Nr.609, datë 8.7.2010

PËR DISA NDRYSHIME NË VENDIMIN NR.607, DATË 11.6.2009 TË KËSHILLIT TË
MINISTRAVE “PËR MIRATIMIN E STRUKTURËS DHE TË NIVELEVE TË PAGAVE TË
PUNONJËSVE ME ARSIM TË LARTË TË ADMINISTRATËS GJYQËSORE TË
GJYKATAVE TË SHKALLËS SË PARË DHE TË GJYKATAVE TË APELIT, DHE TË
PUNONJËSVE ME ARSIM TË LARTË TË ADMINISTRATËS SË PROKURORIVE PRANË
GJYKATAVE TË SHKALLËS SË PARË DHE PRANË GJYKATAVE TË APELIT”

Në mbështetje të nenit 100 të Kushtetutës, të neneve 2 dhe 5/1 të ligjit nr.8487, datë 13.5.1999 “Për kompetencat për caktimin e pagave të punës”, të ndryshuar dhe të ligjit nr.10190, datë 26.11.2009 “Për buxhetin e vitit 2010”, me propozimin e Ministrit të Brendshëm dhe Ministrit të Financave, Këshilli i Ministrave

VENDOSI:

1. Në vendimin nr.607, datë 11.6.2009 të Këshillit të Ministrave, bëhen këto ndryshime:

a) Në pikën 2, lidhja nr.1 “Struktura dhe nivelet e pagave të punonjësve me arsim të lartë të administratës gjyqësore në gjykatat e shkallës së parë dhe në gjykatat e apelit, dhe të administratës së prokurorive pranë gjykatave të shkallës së parë dhe pranë gjykatave të apelit”, zëvendësohet me lidhjen me të njëjtin numër dhe titull, që i bashkëlidhet këtij vendimi dhe është pjesë përbërëse e tij.

b) Pika 3 ndryshohet, si më poshtë vijon:

“3. Paga e grupit (kolona 1) e lidhjes nr.1 është sipas lidhjes nr.2, që i bashkëlidhet këtij vendimi dhe është pjesë përbërëse e tij.”.

c) Pika 7 ndryshohet, si më poshtë vijon:

““Specialistët”, në institucionet e përcaktuara në pikën 1 të këtij vendimi, që punojnë në pozicione që lidhen me procesin e informatizimit të veprimtarisë së administratës gjyqësore e të veprimtarisë së administratës së prokurorive pranë gjykatave, dhe që kërkojnë në mënyrë të detyrueshme Diplomë të Nivelit të Dytë (DND) ose Diplomë të Integruar të Nivelit të Dytë (DIND) apo të barasvlershme me to, sipas legjislacionit të arsimit të lartë, në degët “Inxhinieri elektronike” apo “Informatikë”, përfitojnë një shtesë për “kushte pune”, prej 10 000 (dhjetë mijë) lekësh, mbi pagën mujore të kategorisë përkatëse.

Miratimi i kësaj shtese do të bëhet, rast pas rasti, nga Zyra e Administrimit të Buxhetit Gjyqësor dhe nga Prokuroria e Përgjithshme, në përputhje të plotë me përshkrimin e pozicionit të punës.”.

2. Efektet financiare për paga e sigurime shoqërore, që rrjedhin nga zbatimi i këtij vendimi, do të përballohen nga fondet e parashikuara në Buxhetin e Shtetit për rritjen e pagave, për vitin 2010.

Ky vendim hyn në fuqi pas botimit në Fletoren Zyrtare dhe i shtrin efektet financiare nga data 1 korrik 2010.

KRYEMINISTRI
Sali Berisha

Lidhja nr.1

STRUKTURA DHE NIVELET E PAGAVE TË PUNONJËSVE ME ARSIM TË

LARTË TË ADMINISTRATËS GJYQËSORE NË GJYKATAT E SHKALLËS SË PARË DHE
NË GJYKATAT E AELIT, DHE TË ADMINISTRATËS SË PROKURORIVE PRANË
GJYKATAVE TË SHKALLËS SË PARË DHE PRANË GJYKATAVE TË AELIT

PAGA MUJORE					
POZICIONI	KATEGORIA	PAGA INDIVIDUALE (PAGA BAZË)			SHTESA E POZICIONIT
		1	2	3	4
		Paga e grupit (PG)	Shtesa vjetore për vjetërsi (SHV)	Shtesa për kualifikim (SHK)	Shtesa e pozicionit (SHP)
Përgjegjës i Shërbimeve Mbështetëse në Gjykatën e Krimeve të Rënda	III-a	1	2%		71 000
Kryesekretar gjyqësor Kryesekretar në prokurori Kryetar dege	III-b	1 ose 2	2%		54 000
Sekretar gjyqësor Sekretar pranë prokurorëve Specialist	IV-a	1 ose 2 ose 3	2%		43 000
Specialist	IV-b	1 ose 2 ose 3	2%		33 000

Lidhja nr.2

Vlera e pagës së grupit për grupet e diplomave të arsimit universitar

Grupi i diplomës	Lloji i diplomës	Vlera
1	Diplomë e Nivelit të Dytë (DND). Diplomë e Integruar e Nivelit të Dytë (DIND). Të barasvlershme me to, sipas legjislacionit të arsimit të lartë.	12 000
2	Diplomë e Nivelit të Parë (DNP) apo të barasvlershme me to, sipas legjislacionit të arsimit të lartë + Master i Nivelit të Parë (MNP)	11 000
3	Diplomë e Nivelit të Parë (DNP). Të barasvlershme me to, sipas legjislacionit të arsimit të lartë.	10 000